

“Plenice” na Mostarskom blatu

Bird traps “plenica” in Mostarsko blato: During the visit to Mostarsko blato on 16 November 2006, greater number of special bird traps, called popularly “plenica”, was found in the water.

Bijeg od magle i želja da vidim što više ptica dovele su me 16. novembra 2006. u Mostarsko blato. Pogled na kraško polje i rijeku Lišticu, koja meandrira prije nego je proguta ponor, slika je zadovoljstva za svakog ljubitelja prirode. Dvogledom pretražujem polje nadajući se da ću vidjeti ždralove koji se ovdje redovno odmaraju prilikom jesenje i zimske seobe. Ždralova nema pa odlučujem da se spustim do rijeke. U jednom rukavcu primjećujem pet malih gnjuraca (*Tachybaptus ruficollis*) i to je sve što sam taj dan vidio od ptica. Ali

zato na svakom koraku zapažam odbačene prazne čahure lovačkih pušaka. U plitkoj vodi primjećujem razapete konope za koje u prvi trenutak pomišljam da su parangali za hvatanje riba. Pažljivijim pregledom shvatam da se radi o zamkama za ptice. Zamka se sastoji od konopa dužine do 3 metra koji je razapet između dva štapa pobijena u plitkoj vodi. Na konopu su na razmaku od 7 do 8 centimetara svezane najlonske uzice sa napravljenom omčom. Ispod zamke je prosut kukuruz kao mamac za ptice. Jedan mještatinin mi objasni da se te zamke zovu plenice i da ih ljudi u ovim krajevima od davnina koriste za lov ptica močvarnica. Nekada su ih izrađivali od dlake iz konjskog repa, a sada se koriste vještački materijali. U konačnici rezultat je isti, ptica uhvaćena i zadavljena. Za razliku od nekadašnjih starih lovaca koji su lovili po nekoliko ptica, moderni krivolovci, kako mi reče sugovornik, ulove po nekoliko stotina patki, koje onda prodaju elitnim restoranima. Prošle godine je ulov bio obustavljen zbog straha od ptičije gripe, ali po broju razapetih plenica koje sam pronašao, očito da je to vrijeme straha prošlo, a i sretni dani za ptice selice koje se ovdje spuštaju u nadi da će se odmoriti i naći nešto hrane. To je naša stvarnost. Mostarsko blato je, umjesto odmorište za umorne ptice, postalo njihovo gubilište.



Sl. 1 Plenica (Foto: B. Alimanović)

Ilhan Dervović
Visočkih brigada 21, 71300 Visoko